

Uvodna riječ

Poštovani tražioci posla,

Vjerovatno najvažnije pitanje sa kojim se svakodnevno susrećete jeste pitanje dobre informisanosti o mogućnostima zapošljavanja. Kvalitetna informacija je ključ za rješavanje brojnih problema.

U potrazi za poslom obratite pažnju na sljedeće izvore informisanja:

Kako tražiti posao

Biro rada

U skladu sa svojom primarnom funkcijom, biroi rada su dužni da Vam obezbijede informacije o slobodnim radnim mjestima kojima raspolažu. Mada zakonom nije propisana obaveza poslodavaca da biroima dostavljaju svoje potrebe za zaposlenicima, pojedini poslodavci se obraćaju biroima tražeći usluge posredovanja pri zapošljavanju.

U većini općinskih biroa postavljene su oglasne ploče na kojima možete pronaći isječke iz dnevnih i sedmičnih novina o raspisanim konkursima za slobodna radna mjesta.

Federalni zavod za zapošljavanje i kantonalne službe za zapošljavanje u svojim godišnjim programima i mjerama aktivne politike zapošljavanja redovno uvrštavaju i programe tržišta rada kao pomoć pri zapošljavanju. To su programi prekvalifikacije, dokvalifikacije, poticajna sredstva za samozapošljavanje, programi zapošljavanja osoba bez radnog iskustva i slično. Programi se objavljaju putem javnog konkursa. Da se ne bi desilo da eventualno propustite neki konkurs koji bi Vam odgovarao, a nemate uslove da pratite dnevnu štampu, dolazite češće u Vaš biro za zapošljavanje i informišite se. Održavajte stalan kontakt sa savjetodavcem u

birou rada kako ne biste propustili odgovarajuće informacije. Nemojte sebi dozvoliti luksuz da se u birou pojavljujete svakih 60 dana samo radi evidencije.

Ponudite svoje usluge

Klasična potraga za poslom podrazumijeva predaju odgovarajuće molbe i čekanje poziva na razgovor u preduzeću koje je otvorilo konkurs. Novi trend na tržištu rada je ponuda vlastitih usluga preduzećima koja još nisu oglasila potražnju za slobodnim radnim mjestima ili prepoznala potrebu za angažovanjem radnika određenog stručnog profila zanimanja. Potražite informacije o preduzećima koja imaju namjeru proširivati postojeće kapacitete i koja su uključena u veće projekte.

Početni korak je dobra informisanost o preduzeću i sistematsko upoznavanje sa opisom željenog radnog mesta. Nakon toga dolazi do izražaja Vaša inicijativnost i energičnost. Ponudite vlastite usluge, pošaljite molbu, zakažite razgovor i pokušajte uvjeriti potencijalnog poslodavca da Vas ima u vidu i primi u radni odnos ukoliko se za to ukaže potreba. Prednost ove metode je dvostruka: nemate konkureniju, a možete dobiti radno mjesto koje priželjkujete, dok poslodavac na ovaj način štedi vrijeme i novac koji bi utrošio tražeći odgovarajuću osobu.

Objavljanje vlastitog oglasa

U većini dnevnih novinskih izdanja objava malih oglasa je besplatna ili nije skupa. Međutim, u tih nekoliko riječi koje su Vam na raspolaganju, teško je sažeti sve informacije koje mogu biti interesantne poslodavcima. Oglasavanje u novinama samo po sebi ne doprinosi većem uspjehu, izuzev kada je riječ o nekim specifičnim kvalifikacijama.

Koristeći Internet možete pronaći informacije o otvorenim

ponudama za posao, pretražiti stranice potencijalnih poslodavaca i distribuirati svoju biografiju.

Ukoliko se želite informisati o ponudi slobodnih radnih mjesta u zemljama Evropske unije i objaviti svoju biografiju prema njihovim standardima, posjetite stranicu www.cedefop.eu.int.

Raširite priču – izgradite mrežu

Šireći priču o tome da tražite posao, Vi izgrađujete „mrežu“ u svom okruženju. „Mreža“ može biti vrlo efikasna. Što je više ljudi upoznato da tražite posao, veće su šanse da ćete biti informisani o slobodnim radnim mjestima koja nisu zvanično objavljena ili ste ih propustili u sredstvima javnog informisanja. Razgovarajte sa svojom porodicom, obavijestite poznanike, prijatelje, eventualno bivše poslodavce i kolege. Prednost ove metode, u odnosu na druge, jeste brže i efikasnije zapošljavanje. Tražeći posao putem mreže, možda i započnete raditi na mjestu na kojem nikada ne biste pretpostavili da je moguće zaposliti se.

Pronađite posao uz našu pomoć

Traženje posla sada je Vaš posao!

Služba ne može umjesto Vas tražiti posao, ali Vas može usmjeriti kako se posao traži.

Služba ne može natjerati poslodavca da Vas zaposli, ali Vam može pomoći da ga uvjerite da ste baš Vi njegov najbolji izbor.